



Gij Feihdauh Daxmeh

妈妈的味道

□ Luz Lilanz/陆丽兰

Saedcej ngoenz gvaq ngoenz, gou gaenq miz haujlai nanz mbouj raen daxmeh lo. Liz ranzmbanj geij bi, ngamq caj daengz ngoenz gvaq ciet le cij ndaejhoengq bae ranz caeug bohme gwn donq haexcaez ndeu.

Gij feihdauh gwnzndang daxmeh lumj aen daengngoengz rongh nei raeurubrub, hoeng miz baenz hix ndatndoeck, miz baenz unqswnh.

“Ya, mwngz youh yawj densi le? Cozyez mwngz sij liux caengz?” Daxmeh youq ndaw ranzdajcawj yawj okdaeuj, gangj sangnengneng cam gou, hawj gou roxnyinh lumj yaek byajraez nei. Gou ganjgaenj gven densi bae, buet hauej ndaw rugsaw bae sij cozyez lo. Raen gou buet hauej rugsaw, daxmeh byaij gvaqdaeuj lumj boux lauxsae gaujsi yienghneix cim bae cim dauq. “Yaek gaujsi lo, geij ngoenz neix mboujndaej yawj densi lo, lai yawj di saw he, nyinhcaen sij saw ba.” Daxmeh dingz youq henzndang gou unqswnh naeuz. Gou ngaekgyaeuj diekdiek. Raen gou lauxsaed sij cozyez le de couh byaij okbae nyaengq sij saeh de lo.

Aencung venj youq gwnzciengz “dikdag dikdag” yiengj hwnjdaeuj, cib diemj lo, gou lij youq gwnz mbonq fan bae foek dauq ninz mbouj ndaek, ndawuk cungj dwg sij ciengzmienh dwglau ndaw densi banngoengz yawj-raen, denz goeb gyaeuj mbouj gamj

yawj ok baihrog, daengxndang hanh dumz liux, song fwngz saenzdwdwd hwnjdaeuj, doeklaeng lau dwk daej oksing.

Daxmeh dingqny gou daejhwhw, gaenjgip buet gvaq rug gou daeuj, bengq bunzdenz gou hwnjdaeuj, umj gou hauej rungj de bae, fajfwngz lumh aen gyaeuj gou unqswnh doiq gou naeuz: “Mbouj lau, mbouj lau, meh youq henzndang mwngz, gaej daej lo, ndeindei ninz ba.” Mwh neix, gij gyaez daxmeh couh lumj nditndat seizcin nei, ciuq dwk sim gou raeurubrub.

Moix baez daengz ciet gvaq cieng, gou couh dauqranz yawjyawj, caeug daxmeh gangjgangj gij saeh gou youq baihrog……Dingq daxmeh gangjgangj gij saeh ndawranz, saeh lajmbanj, hix dwg gou bak ngah lo, naemj gwn gij haex byaek homrwdrdw daxmeh cawj haenx.

Gangj daengz gwn, gou couh ngeix daengz gak cungj yiengh gwn doxgaiq lij iq haenx. Daxmeh ciengz-ciengz cawj gak cungj gak yiengh doxgaiq hawj dou gwn. Ngamq byaij hauej ranz, mup raen gij feihdauh haexnaengj homrwdrgw. O ho, caen ndeigwn!

Haex cau, dwg daxmeh ciengz-seiz guh hawj dou, de yungh raemx swiq seuq haexhau, dak hawq. Yungh bathang cau, cau baenz saekhenj gig

ndeyawj, gya di gyuyouz he, couh baenz gij haexcauj homrwdrgw, youh hom youh byot. Moix baez gou gwn ndaej song duix, daxmeh yawj dou ajbak nyaijngoepngoep, de youq bangxhenz naj riunyumnyum, riu dwk song ceh da laep baenz diuz sienq ndeu.

Gou gig gyaez gwn ceizmbarouh, engq gyaez gij ceizmbarouh daxmeh guh. Daxmeh guh ceizmbarouh caen dwg baenzgwn lai bw. De dawz haexcid muh baenz mba le couh yungh raemxraeuj caeug mbahaeuxcid doxgyaux, naemj gwn van di couh gya dangzshau caeug gyau sij ndaej. Gyau baenz le couh hainduj guh ceizmbarouh lo, song fwngz laenx baenz aen baenz aen hung lumj aen daizgiuz nei le, youh mbon aen congh ndeu, dwk daehfouh soiq roxnaeuz baekheu hauejbae caiq laenx luenz ndei couh baenz, mbouj yungh cuengq daehfouh roxnaeuz gijmaz hix ndaej. Guh baenz ndei le cijndaej haifeiz cawj lo, dwk song sam rok raemx roengz rek bae, caj raemx goenj couh dwk dangzhoengz roxnaeuz dangzhau roengz ndaw raemx goenj bae, yaep he caiq dwk ceizmbarouh roengz bae goenj geij faen cung couh ndaej gwn lo.

Daek ceizmbarouh roengz duix bae, gij heiq de biu hauej ndaeng daeuj hom raixcaix. Baez ndaej gwn geij aen, gwn imq lij naemj gwn, gwn

daengz dungx youq mbouj onj bae cij youq.

Mwh deng daxmeh ngauzgyaeuj rangrang naeuz lumj sam ciuh mbouj raen ceizmbarouh nei, gwn mbouj baenz yiengh, naengh mbouj baenz naengh. Dou geij boux youq henz congz doq gwn doq riu, daxmeh caen doiq dou mbouj miz banhfap.

Daxmeh lij rox guh haujlai doxgaiq gwn dem. Haexnaengj haj-saek、faengxmaenz、ceizhaeux……yiengh lawz baenzgwn guh yiengh de.

Dou sam beixnuengx moix baez dauqranz, daxmeh couh hauej ndaw ranzdajcawj bae nyaengqdetdet hwnj-daeuj, de boux vunz ndeu youq ndaw ranzdajcawj nyaengqdidi, hanh lae dumz geu buh de liux, hoeng de cungj dwg naj riuriri cawj gij haexbyaek ndei hawj dou gwn. Gij feihdauh haexbyaek riengz rumz ci ok rogingh daeuj haenx lij daiq miz feihdauh daxmeh, hom raixcaix.

Gij feihdauh daxmeh, buenx gou ciemhciemh majhung. Gou gig vuen-yungz, moix bi cungj ndaej gwn daengz gak cungj haexbyaek daxmeh caenfwngz guh haenx. Gij hom youq byailinx ndaw bak hawj gou roxnyinh daengz, gij neix couh dwg gij feihdauh daxmeh. Gij gyaez daxmeh couh yo youq baihindaw haexbyaek, diemz-cubcub, laeglinlin yaenq youq ndaw-sim ndaw ukgyaeuj gou.

Duzguk youq gwnz bya guh daihvuengz, de gamj gaeb duzmou、duzmax、duzyiengz gwn, hoeng de gag lau duzvaiz. Duzguk vihmaz lau duzvaiz ne?

Cienznaeuz seizgonq, duzguk youq gwnz bya gwn raeg gij nyaenhung nyaen'iq le, roengz laj bya daeuj cimh doxgaiq. Miz ngoenz ndeu, duzguk daeuj daengz henz dah, raen duzvaiz ndeu gwn nywj. Duzguk dungxiek yaek dai, hoeng raen duzvaiz youh sang youh hung, de nanq hoenx mboujhingz duzvaiz, couh mbouj gamj raen naj doq gaemj. De yawj duzvaiz baez ngvanh yaep ndeu, menhmenh byaij gvaqbae cam duzvaiz: “Mwngz heuh maz coh?” Duzvaiz han: “Gou heuh duzvaiz.” Duzguk naeuz: “Raeuz gyau lauxdoengz baenz mbouj baenz?” Duzvaiz naeuz: “Danghnaeuz mwngz miz sim, gou couh nyienh'eiq caeug mwngz gyau lauxdoengz.” Duzguk naeuz: “Daj ngoenzneix hwnj, raeuz couh miz doxgaiq doengzcae z gwn lo.” Duzvaiz naeuz: “Ndei ha, seizneix mwngz couh caeug gou itheij gwn nywj ba!” Duzguk naeuz: “Gou mbouj gwn nywj.” Duzvaiz cam: “Mwngz ij gwn gijmaz?” Duzguk naeuz: “Gou ij gwn

Duzguk Lau Duzvaiz

老虎怕水牛

□ Banh Singhaij/潘星海

noh.” Duzvaiz mbat dingq doq rox duzguk mbouj an simndei, hoeng de cix cang guh mbouj rox lwk. Duzguk yawj raen duzvaiz gwnz dinggyaeuj hwnj song diuz gaeu, youh ngvanh yaep ndeu, cam duzvaiz: “Song diuz gaeu gwnz gyaeuj mwngz yungh gijmaz guh ne?” Duzvaiz naeuz: “Yungh noh guh lo, mwngz yawj mbouj rox ma?” Duzguk naeuz: “Yungh noh guh ha! Lauxdoengz, song diuz gaeu mwngz ndeyawj, hawj gou gaenx yawj mbat ndeu ndaej mbouj?” Duzvaiz naeuz: “Mwngz haengj yawj couh yawj ba.” Duzguk dingq duzvaiz baenzneix gangj le gag riunyaen, nyinhnaeuz duzvaiz ngaiz de yaeuh lo, byaij gvaqbae song yamq doq sawqmwh hai bak haeb diuz gaeu duzvaiz. Byawz rox, duzvaiz diuz gaeu geng dangq diet, duzguk mbat

haeb heuj in dwk yaek doek. Duzvaiz gaenq rox duzguk ij gwn de, vanzlij cang guh ngawz lwk, cam duzguk: “Gij heuj mwngz humz lai ha, vihmaz haeb diuz gaeu gou ne?” Duzguk nyaenx dwk gij heuj youh in youh dot, yaeuh duzvaiz naeuz: “Gou sawq yawj gij gaeu mwngz geng mbouj geng lo.” Duzvaiz youh cang guh mbouj rox-nyinh saekdi, ngaemgyaeuj gag gwn nywj, song ceh da cix caeg yawj duzguk vanzlij ij guh gijmaz banz-daeuz. Duzguk caemh cang guh mboujmiz maz saeh byaij gvaq henz bae, ngamq cienq daengz baihlaeng caekhangx duzvaiz, duzguk faemxfwg saet hwnjdaeuj, coemj gwnz ndang duzvaiz. Duzvaiz rox duzguk yak le gaenq re raixcaix, vaiq cienq ndang yungh song diuz gaeu dingj gvaqbae,

dinggyaeuj duzguk bungq deng gij gaeu duzvaiz le, ndang baez ngeng doq laemx gwnz daem, youh in youh ndatheiq. Duzguk dagaengz duzvaiz maenj song sing, caiq coemj gvaqbae hai bak ij haeb duzvaiz. Duzvaiz hujhaemz dwk nyaenx mbouj ndaej, song diuz gaeu caiq baez dingj gvaqbae, duzguk caiq ngaiz laemx gwnz daem, mbatneix duzvaiz couh haenqrengz yungh song diuz gaeu coeg aen dungx duzguk. Duzguk aen dungx ngaiz duzvaiz yungh gaeu camz song congh, lwed riuz lumj raemxmbouq, couh vaiq gvih duzvaiz gouznyiuz: “Lauxdoengz, gou loek lo, nyiuz gou mbat ndeu ba!” Duzvaiz yiemzhaenq naeuz: “Mbatneix ndaej nyiuz mwngz, baezlaeng caiq gamj sienghaih gyoengqdou, gou couh mbouj nyiuz mwngz lo.” Duzguk cix gangj cix riuz raemxda: “Baezlaeng gou caiq mbouj gamj sienghaih gyoengqsou lo.”

Daj seizneix hwnj, duzguk raen duzvaiz couh mbouj gamj byaij bae gaenx lo. De mboujgag lau duzvaiz hung, youq ndaw ndoeng raen duzvaiz lwg byaij loengroen, de cungj mbouj gamj haeb duzvaiz lwg lo.